

OWEN, JOHN ('Owain Alaw'; 1821 - 1883)

Enw: John Owen

Ffugenw: Owain Alaw

Dyddiad geni: 1821

Dyddiad marw: 1883

Priod: Owen (née Williams)

Plentyn: William Henry Owen

Rhiant: Owen

Rhyw: Gwryw

Maes gweithgaredd: Cerddoriaeth; Perfformio

Awdur: Robert David Griffith

Ganwyd 14 Tachwedd 1821 yn Crane Street, Caerlleon, mab Capten Owen. Cafodd addysg dda, a phrentisiwyd ef ym masnachdy Powell ac Edwards, Cutlers. Ei athro cerdd cyntaf oedd Edward Peters, Caer, ac wedi hynny, C. Lucas, Llundain.

Penodwyd ef yn ieuanc yn organydd yng nghapel yr arglwyddes Huntingdon, ac yn arweinydd i'r 'Octagon Orchestral Society.' Yn 1842 priododd, ac yn 1844 rhoddodd i fyny ei fusnes, ac ymroi i wasnaethu cerddoriaeth. Penodwyd ef yn organydd eglwys S. Paul, Boughton, ac wedi hynny i eglwys S. Bride, ac yn ddiwethaf i eglwys Gymraeg S. Mair, Caer, lle y bu yn organydd a chôr-feistr, ac yn ysgrifennydd yr eglwys hyd ddiwedd ei oes.

Yr oedd yn gyfansoddwr, organydd, a chyfeilydd, a datganwr (bariton) rhagorol. Ceir yn *Haleliwia*, 1849, dôn o'r enw 'Calfari' o'i waith. Yn eisteddfod Rhuddlan, 1851, enillodd ar gyfansoddi'r anthem 'Deborah a Barac,' ac yn yr eisteddfod hon yr urddwyd ef yn 'Owain Alaw.' Yr un flwyddyn yr oedd yn gydradd â [John Ambrose Lloyd](#) ar y gantawd 'Gweddi Habacuc' yn eisteddfod Porthmadog. Yn 1855 yr oedd yn fuddugol yn eisteddfod Llundain ar 'Can Mair,' ac ym Merthyr ar 'Y ddaeargryn,' yng nghymanfa Gwent a Morgannwg ar anthem 'Och, Anuwiol,' ac yn eisteddfod Llanrwst, 1859, ar 'Arnat Ti y llefais.' Yn 1860 dug allan [Gems of Welsh Melody](#), casgliad o alawon, a fu yn wasnaethgar iawn i Gymru. Enillodd yn eisteddfod Caernarfon ar gyfansoddi cantawd 'Tywysog Cymru,' ac ar gyfer eisteddfod genedlaethol Caerlleon, 1866, cyfansoddodd 'G y Gwalia.' Cyhoeddodd *Tonau yr Ysgol Sabothol; The Welsh Harp*, sef casgliad o alawon i bedwar llais; a *Ceinion Alawon Seisnig*. Yn 1878 dug allan ei brif waith - yr oratorio 'Jeremiah.' Bu ei anthemau, 'Pa fodd y glanha,' 'Gwyn fyd a ystyria wrth y tlawd,' ac eraill yn boblogaidd iawn. Cyhoeddwyd ei anthemau, rhanganau, a'i ganiadau yn *Y Gyfres Gerddorol* a olygwyd ganddo, *Y Drysorfa Gorawl*, *Ceinion Cerddoriaeth*, *Miwsig y Miloedd*, *Y Cerddor Cymreig*, *Greal y Corau*, *Y Cerddor*, a *Cronicl y Cerddor*.

Gelwid am ei wasanaeth fel cyfeilydd trwy Gymru, a gwasnaethodd fel beirniad eisteddfodol. Yr oedd wedi ei benodi i feirniadu yn eisteddfod Caerdydd, 1883. Bu farw 30 Ionawr 1883 a chladdwyd ef yn hen fynwent Caerlleon Fawr.

Yr oedd ei fab, W[illiam] H[enry], Owen, yn organydd eglwys S. Bartholomew yn Nulyn. Lladdwyd ef yn y ddamwain ar y rheilffordd ger Abergele, 20 Awst 1868 ac yntau yn ddim ond 23 oed.

Awdur

Robert David Griffith, (1877 - 1958)

Ffynonellau

Y Cerddor, Gorffennaf ac Awst 1892

Cronicl y Cerddor, Mai a Mehefin 1883

Y Geninen, 1883

Bye-Gones, relating to Wales and the Border Counties, 1883

M. O. Jones, *Bywgraffiaeth Cerddorion Cymreig* (1890)

Cymru (O.M.E.), xxvii

Delweddau

LIGC: [Owain Alaw](#), Llyfr Ffoto T Llechid Jones Album, 5v.

Gweithiau

John Owen, *Gems of Welsh melody* (Ruthin 1860-64)

Dolenni Ychwanegol

VIAF: [63575337](#)

Wikidata: [Q15486265](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC-RUU/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

